

Su bentu de is zonas  
De is polus fridus, candu  
Lompid' a terras bonas  
Temperadas a brandu,

Toccad erbas e mattas  
Cun perigulu mannu,  
medas operas fattas  
Suttaponid' a dannu;

Neurras e isturru  
Portad a penitencia  
Spaccad manus e murrus  
Cun pagu riverencia;

Cun sòlidu seccanti  
Currid' in su stradoni  
E brintad' arroganti  
In dogna furrungòni;

Alliad' is mureddas  
Imbistid' is arroccas  
E arsiad' is gunneddas  
De beccias e piccioccas.

Est cosa, custu bentu,  
Chi fald vituperiu  
A su drollu, a s'attentu,  
A su maccu, a su seriu.

Ma, forsa naturali,  
Po tottu si spronad:  
Passendu e fendu mali  
Nudda e nòmus perdonad.

Imparsieli araxi  
Pungid in custa terra  
Chini disaggiad paxi  
Chini pretendid ghèrra

E, in bella libertadi,  
Solè tra is prus sòlus,  
Cun tranquillidadi  
Noi torrad' a is polus.

"Cudducòru"

De antigas canzonis oh maiu  
Prenu de dolci risonanzia !  
Oh froxi tenera de vivaiu  
Chi bincis dogna bixinanzia !

Nebodi chi nascis: oh raiu  
Chi mi ponis in cunfianza  
De su titulu de "aiuiu"  
E m'amentas in importanzia !

Comenti mancu mi seu bistu  
In s'edadi spensamentada;  
Balici cantu e assistu  
A sa tua presentada  
Scarescendu dogna tristu  
Somnu de sa vida passada.

" Cudducòru "

"CAMPANA DE PASCA"

Campan'è Pasca, spraxina su sonu  
Tottu campad'aundi cristianu  
De asori, de paxi e de perdonu  
Movendu su sentidu forti e sanu;

Sa boxi tua passid che a donu  
Annuldadòr' 'e su sensu merranu  
Po chini bivid in superbu tronu  
Po chini sufferenti est fittianu.

Campana nona e non ti tocchid manu  
De chini parad oun animu vili  
Lassus in su caminu de s'umanu.

E accuspangiazel, de 1 cust'abrili  
Po attras Pascas in atru Beranu.  
Giustu finzas a s'ultimu quili. (1)